

**Aningaasaqarnermut Ataatsimiititaliap suliaq nr. 01.31.06/08-00325 pillugu pingasunngornermi ulloq 14. maj 2008-mi aalajangiinera pillugu Naalakkersuisunut ilisimatitsineq.**

(Naalakkersuisut ulloq 17. april 2008-mi ataatsimiinneranni imm. 2b.)

**Narsami toqoraaveqarnerup aaqqissuuteqqinneqarnissaa pillugu Neqi A/S-imik anguniagassat pillugit isumaqatigiissut pillugu**

Naalakkersuisut **inassutigaat,**

- Neqi A/S-imik anguniagassat pillugit isumaqatigiissutissatut missingiut akuerineqassasoq,
- Naalakkersuisut piffissaq ungasinnerusoq isigalugu Neqi A/S pillugu ajornartorsiutit qaangerneqarnissaannut suleqataarusupput, ilaatigut siunissami anguniagassat pillugit isumaqatigiissut assingusoq aqqutigalugu,
- kontomi pingaarnermi 20.11.70-imi aningaasaliissutit 4.000.000,00 kr.-nik ikilineqassasut, aamma
- kontomi pingaarnermi 50.08.16-imi aningaasaliissutit 4.000.000,00 kr.-nik amerlineqassasut.

**Aningaasaqarnermut Ataatsimiititaliap oqaaseqaatai**

Nunalerinermik inuussutissarsiuteqarnermi aningaasaqarneq pillugu Naalakkersuisut aaqqissuussaannik amerlanngitsunik peqataatitaqarluni isumasioqatigiinnissap utaaqqineqarnera pissutigalugu aningaasaliissuteqarnissamik qinnuteqaatip matuma suliarineqarnissaa Aningaasaqarnermut Ataatsimiititaliamit kinguartinneqarpoq. Amerlanngitsunik peqataatitaqarluni isumasioqatigiinneq ulloq 13. maj 2008-mi ingerlanneqarpoq.

Nerukkaattissat taamatullu naggorissaatit akiisa qaffakkiartuinnarnerannik nunalerinermik inuussutissarsiutip maanna tatineqarnera isumasioqatigiinnermi uppenarsineqartoq ataatsimiititaliamit oqaatigineqassaaq.

Taamatuttaaq nunalerinermik inuussutissarsiummut tapiissutit 2008-mi aningaasanut inatsimmi sipaarniarfigineqarsimasut oqaatigineqassaaq.

Nerukkaattissanik nunanit allaneersunit pinngitsuuisinnaannginneq annikillisinniarlugu ilaatigut nunaminertanik naatitsinermi atugassanik pilersitsinissamut aningaasalersuinissaq iluaqutissartaqartutut isigineqarpoq.

Nunalerinermut aningaasaliissutit ataatsimoortumik iluarsartuussivigineqarnerannut atatillugu atugassiissutigineqartussanik 2008-mi aningaasanut inatsimmi kontomi pingaarnermi 20.11.70-imi sillimmatinik immikkoortitsisoqarpoq. Toqoraaviup ingerlaannarnissaata qulakkeerneqarnissaa siunertaralugu aningaasat taakku Neqi A/S-imik sullissinissamik isumaqatigiissummut atugassiissutigineqarnissaat qinnuteqaat manna aqqutigalugu Naalakkersuisut kissaatigaat. Pissutsilli nunalerinermi maanna atuuttut eqqarsaatigalugit Naalakkersuisut siunnersuutaat naapertuutinnigitsutut Aningaasaqarnermut Ataatsimiititaliamit isigineqarpoq. Akerlianilli ataatsimiititaliap isumaqarluni sillimmatitut aningaasaliussat nunalerinermut toqqaannartumik iluaqutissanngortinneqartariaqartut. Taama iliuuseqarneq 2008-mi aningaasanut inatsimmik akuersissutiginninnermi Inatsisartut anguniagaannut naapertuunnerusutut ataatsimiititaliamit isigineqarpoq.

Tamanna tunngavigalugu sillimmatitut aningaasaliussat atugassiissutigineqarnissaat pillugu qinnuteqaammik nutaamik nassiussinissamik Naalakkersuisut kaammattorneqarput.

Neqip aningaasatigut tunngavissaqarnissaata qulakkeerinneffigineqarnissaa pisariaqartinneqarsinnaasoq ataatsimiititaliamit akuersarneqarpoq. Taamaattumillu qinnuteqaammi matumani siunnersuutigineqartoq aqqutiginaq allatigulli toqoraaviup 2008-mi ingerlatsiinnarnissaata qulakkeerneqarnissaanut Naalakkersuisut aningaasanik nassaarsinnaappata ataatsimiititaliamit pitsaasutut isigineqassaaq.

Tassunga atatillugu Narsami toqoraaviup iluarsaannissaanut nutaamilluunniit sananissamut taarsiullugu toqoraaveeqqanik siunissami annertunerusumik atuisinnaaneq naleqqunnerullunilu periarfissaqarnerisq misissorneqassasoq ataatsimiititaliamit siunnersuutigineqassaaq.

**Aningaasaqarnermut Ataatsimiititaliap aalajangiinera**

Siuliani allassimasutut paasinneq naapertorlugu Naalakkersuisut inassuteqaataat Aningaasaqarnermut Ataatsimiititaliamit **itigartinneqarpoq.**

Inussiarnersumik inuulluaqqusillunga

Augusta Salling

Aningaasaqarnermut Ataatsimiititaliap siulittaasua